



25 Joor Glaibasler Källerabschtyyg Mir fyyre mit!

Syt 25 Joor dien sich die Glaibasler Rueche,
 Gegesyttig in iire Gligge-Käller bsueche,
 In dieffi Gwelb gsesch si aabeschtyyge,
 Well deert unde ächti Fasnächtler syyge.
 Ob Gligge, Wäägeler oder Gugge,
 Alli wänn sich dSchtääge aabe drugge,
 Dien in schtinggiger Luft lauwarm Bier suffe,
 Und fyyle sich wool, in dem Jubelhuffe.
 Hoggd ain denn zlang i soomene Käller unde,
 Het är allwääg der Uffstyyg nimmi gfunde.

So Jubelfeschter sinn beliebt,
 Well me maischtens ebbis zÄsse griegt,
 Drumm anstatt allewyl Neys ussbrobriere,
 Duet me lieber dVergangehait zelebriere,
 Und hoffe, ass me joo nyt Neys muess gheere,
 Well das emänd bim Jubiliere kennti schteere,
 Drumm hogg doch zämme mit diine Friinde,
 Denn kenne dir schnäll e Jubelaaloss fiinde.

Duet e Beamte 25 Joor im Biro schloofe,
 Muesch dä bejuble und nit schtroofe,
 Drait aine sit eewigs wulligi Sogge,
 Isch das e Grund um jubelnd zämmezhogge,
 Bschysst der ander sit 25 Joor bi de Schtyyre,
 Muess me das erscht rächt tichtig fyyre,
 Bisch sit 25 Joor schtier,
 Griegsch e gratis Bier,
 Hesch dii vor 25 Joor lo traue,
 Daarfsch jetz e silbrigs Feschkli baue,
 Und wäär der Hund nit vorhäär gschoorbe,
 Wäär au dä grad jubelnd 25 woorde.
 Findsch e verjäästi Urkunde imene Kaschte hinde,
 Kasch au dooderfiir e Jubelgrund finde,
 Duet bim Jasse der 25-zigscht Kontermatch glinge,
 Isch das e Grund fir e Jubelrais no Ormalinge,
 Duesch 25 Joor in der glyche Buude blyybe,
 Griegsch derfir e Woopeschyybe,
 Hoggd sit 25 Joor in der Kische,
 Griegsch e Gschänggkorb vo de Bolizishte
 E Veteran bim FC Bluff wird bischänggt,
 Er het grad si 25-zigschti Pämpel versänggt,
 Duesch dii sit 25 Joor im Schreebergaarte bugge,
 Griegsch zem Dangg derfir e beesi Häx in Ruge,
 Und gheersch au wie mir biraits zu de Alte,
 Fyyrsch diini 25-zigschti Falte.

Zem Juble wänn mir Alte im Santihans blyybe,
 Dien deerte in unsere aigene Käller aabeschtyyge,
 Und Fyyre denne zünftig unser 25-zigscht Jubiläum,
 Mir sinn no derbyy, gheere noonig ins Museum.